

**საქართველოს იუსტიციის მინისტრის ბრძანება N228**  
**2009 წლის 22 დეკემბერი ქ. თბილისი**

**საქართველოს იუსტიციის სამინისტროს მმართველობის**  
**სფეროში მოქმედი საჯარო სამართლის იურიდიული პირის –**  
**მონაცემთა გაცვლის სააგენტოს დებულების დამტკიცების**  
**შესახებ**

თავი IV<sup>1</sup>. „მონაცემთა გაცვლის ერთიანი სისტემით  
სარგებლობისათვის დაწესებული საფასურის ოდენობა და გადახდის წესი (20.04.2012  
N 56)

**მუხლი 12<sup>1</sup>. საფასურის სახეები (20.04.2012 N 56)**

1. მონაცემთა გაცვლის ერთიანი სისტემით სარგებლობისათვის დაწესებული საფასური (შემდგომში – საფასური) არის მონაცემთა გაცვლის სააგენტოს მიერ მონაცემთა გაცვლის ერთიანი სისტემით სარგებლობისათვის დადგენილი სავალდებულო გადასახდელი.

2. მონაცემთა გაცვლის ერთიანი სისტემით სარგებლობისათვის დადგენილია საფასური თითოეული ტრანზაქციისათვის, რომელიც ხორციელდება მონაცემთა გაცვლის ერთიან სისტემაში ჩართული ორგანიზაციის კონკრეტული, ერთეული მომსახურების მისაღებად.

3. საფასურის ოდენობა განსხვავდება მონაცემთა გაცვლის ერთიანი სისტემის მეშვეობით კონკრეტული ორგანიზაციის მიერ სისტემაში ჩართვიდან 1 წლის განმავლობაში განხორციელებული ტრანზაქციების ჯამური ოდენობის მიხედვით.

4. ტრანზაქცია წარმოადგენს ერთეულ საკომუნიკაციო აქტივობას ინფორმაციის გაცვლის მიზნით.

**მუხლი 12<sup>2</sup>. სარეგისტრაციო მომსახურების საფასური (20.04.2012 N 56)**

1. „საჯარო სამართლის იურიდიული პირის – მონაცემთა გაცვლის სააგენტოს შექმნის შესახებ“ საქართველოს კანონის თანახმად, ორგანიზაცია უფლებამოსილია ჩაერთოს მონაცემთა გაცვლის ერთიან სისტემაში და სისტემის მეშვეობით განახორციელოს ტრანზაქციები, რისთვისაც დადგენილია სავალდებულო საფასური.

2. სისტემაში ჩართვის მომენტიდან მონაცემთა გაცვლის ერთიანი სისტემით სარგებლობისათვის დაწესებულია შემდეგი საფასური:

- ა) 1 წლის განმავლობაში 30,000 ტრანზაქციამდე – 2 თეთრი;
- ბ) 1 წლის განმავლობაში 30,000-დან 100,000 ტრანზაქციამდე – 1,5 თეთრი;
- გ) 1 წლის განმავლობაში 100,000-დან 500,000 ტრანზაქციამდე – 1 თეთრი;

დ) 1 წლის განმავლობაში 500,000-დან 1,000,000 ტრანზაქციამდე – 0,7 თეთრი

ე) 1 წლის განმავლობაში 1,000,000 ტრანზაქციაზე მეტი – 0,5 თეთრი.

3. მონაცემთა გაცვლის სააგენტოს გარანტირებული შეტყობინების მომსახურების საფასურია 10 თეთრი.

4. მონაცემთა გაცვლის სააგენტოს ინფრასტრუქტურის გავლით მიწოდებული ელექტრონული დოკუმენტის საფასურია 5 თეთრი.

5. მონაცემთა გაცვლის სააგენტო უფლებამოსილია ხელშეკრულების საფუძველზე განსაზღვროს ამ მუხლის მე-2-მე-4 პუნქტებით გათვალისწინებული საფასურისაგან განსხვავებული საფასური ან მომსახურების პირობები კონკრეტული ორგანიზაციისათვის ან ორგანიზაციათა ჯგუფისათვის.

6. საფასურის გადახდისაგან გათავისუფლებულია ყველა ტრანზაქცია, რომელიც ხორციელდება სისხლის სამართლის საქმის წარმოებასთან დაკავშირებით.

### **მუხლი 12<sup>3</sup>. საფასურის გადახდის წესი და პირობები** (20.04.2012 N 56)

1. საფასურის გადახდა შესაძლებელია წინასწარი გადახდის ფორმით ან ხელშეკრულებით გათვალისწინებული პირობებით.

2. ხელშეკრულებით გათვალისწინებული მომსახურების ვადა არ უნდა აღემატებოდეს ერთ წელს.

### **მუხლი 12<sup>4</sup>. გადახდილი საფასურის დაბრუნების წესი** (20.04.2012 N 56)

1. განმცხადებელს გადახდილი საფასური უბრუნდება, თუ საფასური გადახდილია ამ ბრძანებით ან ხელშეკრულებით განსაზღვრულ განაკვეთზე მეტი ოდენობით. ამ შემთხვევაში ბრუნდება სხვაობა გადახდილ თანხასა და ამ ბრძანებით ან ხელშეკრულებით განსაზღვრულ განაკვეთს შორის.

2. საფასური ბრუნდება მოთხოვნიდან 10 სამუშაო დღის ვადაში. მოთხოვნა უნდა შეიცავდეს გადახდილი საფასურის ნაწილობრივ ან სრულად დაბრუნების კანონიერი საფუძვლის არსებობის დასაბუთებას. მოთხოვნა წარდგენილი უნდა იქნეს საფასურის გადახდიდან ერთი თვის ვადაში. ამ ვადის გასვლის შემდეგ გადახდილი საფასური არ ბრუნდება. ამ ვადის გაგრძელება ან გაშვებული ვადის აღდგენა დაუშვებელია.